

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 1. Februar 2022

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här Staatsminister, d'Madamm Gesondheetsminister an den Här Mëttelstandsminister weiderzeleeden.

Wéi d'Regierung an der Äntwert op meng parlamentaresch Fro Nummer 5426 geschriwwen huet, war et op Basis vum Contact Tracing méiglech, bei der Gestiou vun der COVID-Situatioun verschiddenen Infektiounen engem potenziellen Ursprongsberäich vu gesellschaftlechen Aktivitéiten, an deem Fall dem Sport, zouzeuerdnen. An de leschten zwee Joer wor awer kee Beräich sou strenge Moosnamen ënnerwerf, déi doriwwee raus méi wéi dacks changéiert hunn, wéi d'HORECA an d'Nuetsclubb. Fir datt esou Moosname vun de Leit eegeverantwortlech respektéiert kënnen ginn, ass et immanent, datt dës kloer strukturéiert an net mëssverständlech sinn a proportional zu der Situatioun stinn.

An deem Sënn géif ech der Regierung gär dës Froe stellen:

- 1) Kann d'Regierung matdeelen, wéi vill Infektiounen mam COVID-19 säit dem 1. Mäerz 2020 potenziell an/oder tatsächlech a Relatioun mam HORECA-Beräich an den Nuetsclubb festgestallt gi sinn? Kann d'Regierung eng Grafik presentéieren, déi den zäitlechen Oflaf vun dësen Infektiounen säit dem 1. Mäerz 2020 bis zum 31. Dezember 2021 ofbillt? Kann d'Regierung unhand vun dëser Grafik elaboréieren, wéi dës Infektiounszuelen am Zesummenhang mat der Upassung vun de COVID-Mesuren an deene genannte Beräicher stoungen, déi am Kader vum Gesetz vum 17. Juli 2020 souwéi senger 24 Modifikatiounen bis zum virdu genannte Stéichdatum, erlooss goufen?
- 2) Kann d'Regierung eng Grafik presentéieren, wéi d'Zuel vun deene Leit déi vum 1. Mäerz 2020 bis zum 31. Dezember 2021 potenziell an/oder tatsächlech a Relatioun mam HORECA-Beräich an den Nuetsclubb positiv op de COVID-19 getest goufen, sech opdeelt, op Leit déi sech am baussenzege Beräich vun den Terrassen an am bannenzege Beräich ugestach haten a wéi dës Zuelen iwwert de genannten Zäitraum variéieren? Kann d'Regierung eng Grafik presentéieren, déi weist, zu wéi enger ënnerschiddlecher Auerzäiten d'Leit sech (och opgedeelt no deene genannte Beräicher) ugestach haten a wéi dës Erkenntneser am Zesummenhang mat der Upassung vun de COVID-Moosnamen an der HORECA an den Nuetsclubb stoungen, déi am Kader vum Gesetz vum 17. Juli 2020 souwéi senger 24 Modifikatiounen bis zum virdu genannte Stéichdatum, erlooss goufen?
- 3) Kann d'Regierung matdeelen, wéi vill vun deene potenziell an/oder tatsächlech a Relatioun mam HORECA-Beräich an den Nuetsclubb positiv op de COVID-19 getest Leit keng Symptomer haten a wéi vill liicht Symptomer gewisen hunn? Wéi vill vun deene Leit hu missen hospitaliséiert ginn a wéi vill vun hinnen hu missen op der Intensivstatioun behandelt ginn? Kann d'Regierung den zäitlechen Oflaf vun dësen ënnerschiddleche Krankheetsbiller unhand vun enger Grafik visualiséieren? Kann d'Regierung op där Basis preziséieren, ob de Verlaf vun der COVID-

Situatioun am HORECA-Beräich an den Nuetsclubb en Vue vum zäitlechen Oflaf, souwéi vum symptomateschen Impakt vun de Krankheetsbiller hier, hei ausgedréckt a Prozent, ëmmer proportional zu der Situatioun am Rescht vun der Gesellschaft stoung? Falls net, wéini hu gréisser Ofweechunge stattfonnt a wéi goufen dës an der Ursachenanalyse vun der Regierung bewäert? Wéi sinn se am Sënn vun der Fro virdrun an déi eenzel Gesetzestexter mat agefloss?

- 4) Mam COVID-Gesetz vum 18. Oktober 2021, souwéi och mat de Modifikatioune vun deem Gesetz goufen d'Moosnamen am HORECA-Beräich sou wéi den Nuetsclubb stufeweis ëmmer méi verschäerft an et gëllt méttlerweil flächendeckend den 2G-Regime. Kann d'Regierung matdeelen, wéi vill Leit déi säit dem 1. Januar 2021 potenziell an/oder tatsächlech a Relatioun mam HORECA-Beräich an den Nuetsclubb positiv op COVID-19 getest goufen, zum Zäitpunkt vum positive PCR-Test eng éischt Impfdosis, eng zweet Impfdosis oder eng Boosterimpfung (inklusive deene Leit, déi eng Dosis vum Johnson & Johnson Vaccin gesprézt kruten a jee no Definitioun net als geboostert gëllen) empfaang haten? Kann d'Regierung matdeelen, wéi vill Leit, déi am Zäitraum vum 1. September bis zum 17. Oktober potenziell an/oder tatsächlech a Relatioun mam HORECA-Beräich an den Nuetsclubb positiv op COVID-19 getest goufen, zum Zäitpunkt vum positive PCR-Test nach keng éischt Impfdosis haten a wéi eng Krankheetsbiller sech fir déi jeeeweileg Gruppe gewisen hunn?
- 5) Wéi schonn an der Fro virdu geschriwwen, gëllt säit dem 18. Oktober 2021 am HORECA-Beräich sou wéi an den Nuetsclubb den 2G-Regime. Am Kader vun enger Pressekonferenz zu der Adaptatioun vun de COVID-Moosnamen vum 8. Oktober huet den Här Staatsminister a Presenz vun der Madamm Gesondheetsminister Follgendes ausgesot: "*Mir sinn eis bewosst, dass mer mat dese Mesuren d'Liewe vun net-geimpfte Leit manner agreabel maachen, mee mir hu kee Choix*". Déi allermeescht Bierger empfangen dat sozial zesummesinn an engem Restaurant, engem Café oder och nach an enger Disko als agreabel. Kann d'Regierung confirméieren, datt d'Moosnamen am HORECA-Beräich an den Nuetsclubb ausschliesslech op medezinesch Analysen an Iwwerleeungen zeréckzeféiere waren an ausschléissen, datt politesch Ziler, wéi zum Beispill d'Leit zu enger Impfung géint de COVID-19 ze beweegen eng Roll gespilt hunn? Falls net, wéi eng speziell Kompensatiounsmoosname goufen en Place gesat, respektiv sinn nach geplangt fir all déi betrafte Geschäftsleit ze entschiedegen? Op wéi enger Verfassungs- a Mënscherechtlecher Grondlag wier sou eng Entscheidung geholl ginn?

Mat déiwem Respekt,



Jeff Engelen  
Deputéierten